

ARREST

DE LA COUR

no. 11

DES MONNOYES.

Portant décry des monnoyes de bas bilon & cuiure en forme de sols & doubles de France, sous le nom de la Princesse de Phalcebourg, l'empreinte desquelles monnoyes est au bas dudit Arrest.



A PARIS,

Chez SEBASTIEN CRAMOISY Imprimeur ordinaire du Roy és Monnoyes, rue Saint Jacques, aux Cicognes.

M. DC. XXXIII.

AVEC PRIVILEGE DV ROT.

A. R. 12



THE
LIBRARY OF THE
MUSEUM OF NATURAL HISTORY
AND
ZOOLOGY
OF THE
CITY OF LONDON
1871



*Extrait des Registres de la Cour
des Monnoyes.*

SVR ce que le Procureur general du Roy a remonstré à la Cour , qu'en cette ville de Paris commencent d'estre exposées en payement pour & au lieu de douzains certaines monnoyes de bas billon , fabriquées en la presente année sur la frontiere de Lorraine dans la ville & Principauté de Lixfin, sous le nom & autorité de la Dame Princesse de Phalcebourg , lesquelles mon-

noyes ont esté faictes par imitation des sols faicts dans les Monnoyes de France , ayans mesme forme & figure, portans d'un costé pareilles Croix , Couronnes & Fleurs de Lis , & en mesme position , avec la mesme deuise , non iamais cy deuant employée aux monnoyes de Lorraine : & de l'autre part semblable Escusson & Couronne au dessus, qu'aux autres douzains ; dans ledit Escus trois Fleurs de Lis , disposées comme dans celuy de France , seulement apparentes , & en chef & sur la pointe d'iceluy trois demies Fleurs de Lis peu visibles , & aux deux costez la lettre H , comme aux sols faicts du temps des Roys Henry II. III.

& I V. lequel costé d'escus artificieusement a esté faict de plus bas relief que celuy de la Croix, afin que le peu de difference qui s'y trouue d'auec lesdits douzains soit moins remarquable, & que plus facilement lesdites monnoyes estrangeres soient indifferemment receuës comme douzains de France, lesdites monnoyes toutesfois estans d'alloy & de poids beaucoup inferieures ausdits douzains, duquel susdit artifice se sont encore seruis en la presente année les fabricateurs desdites monnoyes en la fabrique de leurs monnoyes de cuire souz le nom de ladite Dame, lesquelles ils ont faict semblables de forme, figure & inscription

aux doubles tournois du Roy ,
combien qu'elles soient beaucoup
plus deffectueuses en qualité &
quantité de leur matiere , & i-
celles faiët apporter & exposer
dans ce Royaume , pour en con-
treschange desdites monnoyes de
bas billon & cuiure transporter
à vil prix le meilleur or , argent
& marchandises dudit Royaume,
lesquelles monnoyes de cuiure
ont esté décriées par Arrest de la-
dicté Cour du vingt - septiesme
Aoust dernier. Requerant afin
de pourueoir à la perte que le
public pourroit faire en l'expo-
sition desdictes monnoyes , que
celles de bas billon en forme de
sols de France seront décriées de
tout cours & mise , & que ite-

ratives deffenses seront faictes de
receuoir au poids & par sacs au-
cuns douzains, ains seulement au
compte & à la piece, que les-
dites monnoyes de cuiure seront
aussi derechef décriées, & enioint
à tous ceux qui en auront de les
porter aux Fermiers des Mon-
noyes & aux Changeurs, pour
leur en estre baillé la iuste valeur,
& estre cisaillées en leur presence
incontinent apres le decry qui en
aura esté faict: deffenses à toutes
personnes d'apporter ni exposer
dans ce Royaume desdictes mon-
noyes de bas billon & cuiure, sur
peine de confiscation desdictes
monnoyes, & des marchandises
ensemble emballées, che-
uaux & charrettes qui les porte-

ront & voictureront, & d'amen-
 de arbitraire, & qu'en tous lieux
 où elles seront trouuées, elles
 seront saisies, & informé desdits
 enuois & expositions, pour estre
 procedé contre les coupables
 suiuant la rigueur des Ordonnan-
 ces. LA COVR faisant droict
 sur le Requisitoire dudit Procu-
 reur General, a décrié & décrie
 de tout cours & mise les especes
 de monnoyes de bas billon faictes
 & fabriquées en forme de sols de
 France en la presente année sur
 la frontiere de Lorraine, sous le
 nom & autorité de la Princeſſe
 de Phalcebourg, a faict & faict
 expresse inhibitions & deffen-
 ſes à toutes personnes de quel-
 que estat, qualité & condition
 qu'elles

qu'elles foiēt, d'apporter, receuoir, ni exposer tant en cette ville de Paris qu'autres lieux de ce Royaume, desdites especes: a enioint & enioint à tous ceux qui ont, ou auront d'icelles especes, de les porter aux Maistres & Fermiers des Monnoyes de sa Majesté, ou aux Changeurs pour estre en leur presence cizaillées, & la iuste valeur à eux payée, à peine contre les contreuenans de confiscation desdites monnoyes, & des marchandises qui se trouuerront ensemble emballées, cheuaux & charrettes, & d'amende arbitraire, le tiers desdictes amendes & confiscations applicable aux dénonciateurs. A ordonné & ordonne, qu'à la requeste dudit

Procureur General lesdictes especes seront saisies & arrestées par tout où elles seront trouuées, & sera informé desdits enuois & expositions, pour estre contre les contreuenans procedé suiuant la rigueur des Ordōnances, & ce par le premier des Presidens ou Conseillers Generaux de ladite Cour trouué sur les lieux, & en leur absence par les Iuges ordinaires des monnoyes, & autres Iuges Royaux sur ce premiers requis, chacun en leur ressort. Et seront lesdictes monnoyes de cuiure faictes en forme de Doubles sous l'autorité de ladicte Princesse de Phalcebourg, de rechef décriées. Et fait en outre la Cour iteratiues deffenses de receuoir aucuns

douzains au poids , ains seulement au compte & à la piece. Et sera le present Arrest leu & publié à son de trompe & cry public, & affiches mises & apposées aux Carrefours de cettedicté ville de Paris , & coppies signées du Greffier de ladite Cour enuoyées aux Baillifs, Seneschaux, & autres Iuges des villes de cedit Royaume , pour y estre pareillement leu & publié. Enjoignant aux Substituts dudit Procureur General d'y tenir la main, & certifier ladite Cour de leur diligence au mois. Faict en la Cour des Monnoyes le dix-neufiesme iour de Septembre mil six cens trente trois.

Signé, DELAISTRE.

B ij

L'an mil six cens trente trois, le 24.
iour de Septembre, fut l'Arrest cy dessus
publié à son de trompe & cry public aux
Carrefours & autres lieux tant ordinai-
res qu'extraordinaires de cette ville &
faux-bourgs de Paris, en la presence de
nous Nicolas Lambert, & Nicolas de La-
boisiere Huiſſiers en ladite Cour des
Monnoyes, souſſignez, par Simon Le-
duc Juré Crieur en ladite ville, Preuo-
ſté & Vicomté de Paris, accompagné de
Mathurin Noiret Juré Trompette, &
de deux autres Trompettes: comme aus-
ſi a esté ledit Arrest affiché par nous en
tous les lieux accoustumez de ladite vil-
le & faux-bourgs de Paris, à ce qu'au-
cun n'en pretende cause d'ignorance.
Signé, Lambert, & de Laboisiere.

Ensuivent les figures des sols & doubles
decriez par le susdit Arrest.



Collationné à l'Original , par moy Greffier en
chef de ladite Cour des Monnoyes, sous-signé.





